

Strategyske piramide Jongfryske Mienskip

Yn 2020 hat de Jongfryske Mienskip neitocht oer de fraach: "Wat docht de Jongfryske Mienskip?" Yn dit dokumint wurdt ús strategyske piramide taljochte. It bestjoer fan de Jongfryske Mienskip wurket neffens sykly fan fiif jier. Yn ien sa'n syklus wurde in stikmannich boustiennen definiearre, dy't ús tichter by ús doel bringe moatte.

Us missy - wêr giet it ús om?


Us missy is twaliddich:

- It paad nei mear Fryske autonomy yn 2050.
- Mear rjochten foar de Friezen as nasjonale minderheid.



Us strategy – hoe wolle wy ús missy stal jaan?

Ferkenne, ferbine, ferbreedzje en aksje!



Us driuwfear – wêrom wolle wy dat?

Wêrom wolle wy dat?

Folken sûnder steat ferdwine út de skiednisboeken. Wy wolle krekt in takomst yn Europa.

Wêrom moat dat?

Oars sjogge wy ús taal, kultuer, tradysjes en identiteit ferdwinen.

Wêrom moat dat ék?

De taal, kultuer, tradysjes en identiteit jouwe Fryslân syn eigen unyk gesicht.

Wêrom binne dy dingen wichtich?

Se binne al iuwenlang it fûnemint fan ús Fryske mienskip en dy grûnslach soarget foar ferskaat yn Europa en de wrâld.

Us wearden - wêr leauwe wy yn?

1. Frysk is in eigen ûnôfhinklike identiteit, los fan Nederlân en Dútslân.
2. Wy dogge as Jongfryske Mienskip net oan partijpolityk.
3. 'Fries is, wa't him Fries fielt': wy stribje ynklusiviteit nei. Immen dy't him/har as Fries identifisearret, is sûnder mis in Fries.
4. Wy wize ekstreme (politike, ideologyske) streamingen, sawol lofts as rjochts fan it politike spektrum, ôf.

Us fisy - wêr wolle wy hinne?

1. De Jongfryske Mienskip wol yn politike rûnten in sterkere eigen lobby.
2. De Jongfryske Mienskip wol it Frysk bewustwêzen op it mêd fan taal en skiednis yn it ûnderwiis fergrutsje.
3. Wy wolle dat it Frysk mear sichtber wurdt yn de mienskip en dat de taal mear brûkt wurdt.
4. De Jongfryske Mienskip is fan betinken dat identiteit (ek: ynter-Fryske identiteit) fersterke wurde moat.
5. It mienskiplik bewustwêzen yn de (histoaryske) Fryske lannen stimulearje en emansipearje.

Us algemiene doelen - wêr geane wy foar?

1. Friezen yn de Fryske lannen mei elkoar ferbine en ús oppenearje as mienskiplike Europeeske regio.
2. Utfiering jaan oan it Ramtferdrach foar de Beskerming fan Nasjonale Minderheden: it sichtber meitsjen fan de Fryske identiteit yn offisjele dokuminten.
3. Yn basis en fuortset ûnderwiis lesmateriaal ûntwikkelje litte dêr't de skiednis fan de Friezen in plak yn kriget.
4. Op syn minst lykweardigens en lykberjochting fan Frysk en Nederlânsk yn alle domeinen.
5. (Fiskale) autonomy foar Fryslân.
6. Fryslân is by steat om yn it eigen enerzjyferlet te foarsjen. Meisizzenskip oer it winnen en de opbringst fan grûnstoffen. Meisizzenskip oer it winnen en de opbringst fan duorsume enerzjy.
7. Fryslân is selsfoarsjennend op it mêd fan iten en drinken.
8. Fryslân kin foarsjen yn de eigen rjochtspraak.
9. De Jongfryske Mienskip is in polityk ûnôfhinklik fermidden dy't de stim foar Fryslân fertsjintwurdiget. Dit kin dy dwaan om't er ûnôfhinklik bliuwt fan politike en jildlike streamen. It bliuwt in groeiende

organisaasje dy't foar ferbining by de eigen leden soarget. De Jongfryske Mienskip is werkenber, sichtber, wurdt heard, paadsljochtet en set de trend. In beweging om rekken mei te hâlden.

10. Wy wolle de sizzenkip oer de ynrjochting fan ús ynfrastruktuer en ús lânskip.

Us gjalp

Underweis nei autonomy!

De útlis

Autonomy is in begryp dat op ferskillende wizen útlein wurde kin. Foar de Jongfryske Mienskip betsjut autonomy it neikommende:

Fryslân is by steat om te soargjen foar in eigen enerzjyfoarsjenning, itenfoarsjenning, rjochtspraak en hat it foech om it eigen ûnderwiis stal te jaan. Dêrnjonken hat Fryslân in sterke eigen regionale identiteit dy't yn bûtenlânske kontakten ek brûkt wurdt.

It is foar him dy't him/har Fries/Friezinne fielt, mooglik om de Fryske nasjonaliteit oan te nimmen en dêrby it Nederlânsk steatsboargerskip te behâlden.

It grûngebiet fan de hjoeddeistige provinsje Fryslân wurdt, troch it takennen fan de *status aparte*, it fjirde lân yn it Keninkryk Nederlân – en hat dêrmei deselde status as Aruba, Sint Marten en Curaçao (Kurasao). It heechste demokratysk keazen orgaan fan de Provinsje (de Fryske Steaten) wurdt dêrmei it Parlemint fan Fryslân.

Sykly

De sykly binne: 2021-2025, 2026-2030, 2031-2035, 2036-2040, 2041-2045, 2046-2050

Konkrete doelen yn syklus 2021-2025

Media:

- In alsidige Omrop Fryslân mei mear stjoertiid en wrâldnijs yn it Frysk.
- Dêrneist in twadde radiokanaal foar jongerein (Fryslân 1 en Fryslân 2).
- Populêre tekenfilmsearjes en films yn it Frysk beskikber meitsje.

Underwiis:

- Fryske skiednis yn it kurrikulum opnimme.
- Yn it primêr ûnderwiis moat der in ferplichte eintoets Frysk komme. It Frysk dan meinommen yn de einopbringsten.

Identiteit:

- De kier ûntdekke foar yn de emansipaasjestap om de Fryske nasjonaliteit formeel te meitsjen. Dat dogge wy ûnder oaren troch ûndersyk nei de juridyske mooglikheden.
- Us taal wurdt sichtber op offisjele dokuminten.

Kultuer:

- In nij stânbyld foar Rêdbâd mei fonteinen.

Autonomy:

- De Jongfryske Mienskip folget it politike debat oer de enerzjytransysje en soarget der, binnen syn mooglikheden, foar dat it opwekken fan enerzjy yn Fryslân lyk stiet oan it ferbrûk yn Fryslân. Fryslân wurdt net in wingewest fan Nederlân.
- De Jongfryske Mienskip folget it politike debat oangeande de itensfoarsjenning en soarget der, binnen syn ynfloed, foar dat Fryslân yn teory genôch iten produsearret om de ynwenners fan de Provinsje dêrfan foarsjen te kinnen.
- Yn 2025 hat de rjochtbank op syn minst 5 tolken Frysk.

De organisaasje:

- De Jongfryske Mienskip fasilitearret Nij Frisia en hat dêrmei in kwaliteitsblêd foar de leden.
- Yn 2025 hat de Jongfryske Mienskip 150 beteljende leden.
- Yn 2022 hat de Jongfryske Mienskip in eigen logo, hússtyl en webside.
- Alle jierren organisearret de Jongfryske Mienskip in aktiviteit foar de leden en in ynter-Fryske aktiviteit (Explore the North).